

鳴

玉

堂

稿

鳴玉堂稿卷之十

明甘肅行太僕寺卿前湖廣督學副使山陰張天復著翰林院修撰不肖男元竹謹校

山東左叅政門人陳文燭選梓

雜著類

識 御製文軸後

辛亥之夏臣以陋劣承乏祠曹竊嘗宵分抱牘從  
秩宗百執事之後迎俟宸蹕輒伏觀奎章睿  
翰降自宣室頃刻數下諸臣捧讀靡不仰頌我  
皇上承玄享帝精禋之薦而嘆服其詞翰瑰麗尤  
非藻墨之士所能彷彿萬一也猗與休哉是卷乃

秘宮落成祈答諸神午夜手製以勅太宗伯階  
者既祀竣臣竊以其草稽首頓首受而藏之俾傳  
之奕世獲窺我

皇上不特藝文之精而明良交邁恩遇優渥類如  
此是以中興駿業軼千古而師百王有繇然也猗  
與休哉

嘉靖三十五年五月吉日禮部儀制清吏司郎中  
臣天復誠惶誠恐稽首頓首謹跋

碧雞山滇海廓清碑題名

嘉靖甲子春南中逆寇僭亂境內外黠酋緣間蠢

動大中丞謀于巡臺徵兵幕府授算岐嶷鳴邦廷  
蘭分道西討而綸大道拊戢于東踰月西執馘東  
遁內酋亦就繫銷甲歸農者數十萬家南中平奏  
効

天子仲夏丙寅飲至于威遠之堂某爰表功德僭  
書楣端而符為勒石立碧雞山俾勿壞時孟秋辛  
丑朔

跋蘇長公墨竹

長公墨竹世所傳者多石刻真跡罕觀是筆尤勁  
逸出塵新昌呂公平陽少府寶之數百年而失去

今大司馬公復得之。僉曰：「不偶然，則神物在人間。」散而復合，如劍津雙龍者，豈少哉？或曰：「長公風節大類此君，托以不朽，宜非其人弗與也。」

跋莫山人越游紀

吳中人士束髮輒工詩，故吳中詩每工勝他方。然多綺麗，派自相承，雖捫卷人輒知其為吳語也。莫山人固吳產，工詩至忘寢食，每所到句輒滿囊，顧澹雅雋永，畧不見吳語。昔昌黎評樊著作詩務出於古，然而不襲人一句一字，蓋足當之云。山人故善趙廷尉公，是歲春山人訪廷尉公，若耶山中偕。

過余別館因聞于岑使君使君雅邃於文乃時時  
竒山人為倒屣延致郡亭集郡中人士酬倡詠譔  
若王內史袞襖舊事暨別為刻其入越所著若干  
篇命之曰莫山人越遊紀噫以山人之研詩忘寢  
食使當其時入越不因廷尉公聞于使君山人必  
且為賈浪仙耽吟推敲於道犯使君騶使君遇而  
竒之相與訂字句並輿而歸若昌黎事不益增使  
君竒節傳郡中視昔內史多美談耶

書何石湖卷後

余束髮而知吾鄉有石湖先生者為當世名碩弱

冠始獲瞻即其顏論惇龐愿慤盖粹古長者不特  
其立朝風操足厲吾後生也王文正公所稱築太  
平之基壽宗社之脉者非斯人其誰哉謝去棗梓  
已若干年而復得讀其與友人胡復之小札斷簡  
殘篇不盈尺牘乃古道友情切然溢於詞表嗚呼  
是豈當世杯酒論交片言解携者可倫也宜胡氏  
子孫世講其義而誦慕之不置也雖然不知其人  
可乎

跋皆山堂記後

剡川佳山甲會稽新昌故剡境也是堂充萬山深

覲據沃攬幽蓋今大司空沃洲呂公五世祖三六  
翁所稱傳數葉而奪於有力者公購復之隆慶丁  
卯公自黔中還乃以賜金拓地構堂揭往昔名公  
諸題識於其上華亭錢公溥隴右彭公澤翰墨尤  
重一時揮灑曄然祖德斯在呂氏自宣和中由洛  
下徙越入國朝至公歷十餘世凡五作相三上卿  
章縫鄉校每百餘人翱翔仕籍者不可殫數而在  
洛者無聞矣復以晚進屢登公堂討問遺事商彝  
周鼎嶧桐嶰竹率昔賢故物而齋廬畦苑穆然清  
風無繇壁葯房雕楹茵閣與豪華甲第相埒於休



我匪呂氏所以奕世數百年而不替者哉斯可以  
觀矣山陰張某跋

題平南古渡坊

漢諸葛武侯平南中建橋浪滄江以濟師唐尉遲  
公曾再修築而侯開勦之迹未湮也余按博南爰  
命為坊表侯功德示萬世時守巡分部則叅政廬  
某僉事蕭某張某一時偕至則按察使劉某叅政  
陸某副使張某僉事張某鳩工樹坊則永昌知府  
秦某同知趙某保山知縣某

友盟

乙丑之夏復甫謝病脫簪林居青山入座群卉繞  
廬庭鳴鳥雀門無俗車遂訂友盟以廣交與盟曰  
春夏之隙余取八友秋冬五友松竹幽姿寒暄交  
陰余與並適無時不友吁嗟諸君席爾清馨祛我  
塵襟毋謂余鄙質爾山靈諸君許可余乃臨止水  
坐白石釣潛鱗玩飛翼白雲度空山月在壁索咲  
几筵徘徊終日同咲伊誰一笑浮白談二笑手談  
三笑松侯楮伯管大夫談虎溪不讓二仲時至夷  
猶卒歲爾毋余棄若乃戚戚崇朝營營萬慮業障  
沉冥余非所志

春友八

碧桃

紫荊

牡丹

芍藥

海棠

玉蘭

杜鵑

粉團

夏友八

竹桃

笑渠

石榴

山梔

茉莉

玫瑰

紫薇

扶桑

秋友五

芝蘭

菊

桂

芙蓉

金蓮

冬友五

山茶

梅

瑞香

海桐

臘梅

忤鬼字說

汝生而魁梧汝祖曰嘻其昌而宗名汝曰元忤識

喜也今汝且冠而汝祖弗及見矣字汝曰子蓋汝其勗哉詩曰王之蓋臣母念爾祖

修築運河塘路募緣疏

伏以邑有湖塘地當運道創自南宋則郡守汪公網張公遠猷實居濬鑿之勞沿及皇朝則邑令李公良張公煥尤多甃成之績自山陰達于蕭山延袤一百餘里郵驛相通由咸淳迄于嘉靖上下四百餘年官私咸利綿柳棠於一望而長虹卧波人無艱步曾日月之幾何而斷岸千尺旅多蹶蹄周道既不能以如砥禹貢亦何自而若流四津衝

要怨咨盈長短之亭萬趾崎嶇病涉苦淺深之瓠  
茲我徐侯拊臨勾邑輜車初下輒憐民瘼之多艱  
職貢維修尤惧歲輸之難繼限投納由坊及都而  
民自樂趨盡蠲三尺之苛寬稅契貸什之二而戶  
無多權連賚一分之賜乃西行郊陌見濱湖傾剝  
之甚頽歆出官緡計公帑詘乏之已極於是詢衆  
稽謀從權設法牒僧廣募甃石重修蓋明侯政崇  
大體濟人無用乘輿緣加不費之惠在吾鄙德務  
陰施渡蟻尚輸竹筏當導錫類之仁請各割贊以  
助用廣福田之緣佇看不日而成茂起靈臺之頌

君子履而小人視俄臻蕩蕩平平明中捨而暗裏  
未都付蒼蒼浩浩冀從樂助謹勸諸檀

湯侯祠龐侯祠二太守祠功德疏

嘗聞秩祀之典母諂母濫而繫民之思維德與功  
德者所以表率乎一方而功則有以永賴於萬世  
垂之政績而遠邇咸沾或以牧或以憲存歿殊而  
遺愛匪二陳之俎豆而幽明無忤或專祠或並祀  
蒸享異而報施實均繫昔篤齋湯侯牧我茲土心  
厯匡濟量本弘慈念江濤海漲每爲一方之憂乃  
築閘甃隄歲防三邑之患啓閉有則濬洩以時飛

梁二十八洞迄今三十餘年旱潦無侵年時多稔  
天開樂土澤幸垂於一人地享常登功允賴於萬  
世祀典所謂能禦大災能捍大患公實有之蓋可  
以邁焉公於無前配神禹而不忝者也願海閩雖  
有遺祠而郡治尚無專祀懸依徒切瞻眄無從士  
民之心鬱焉未達茲卜于徵愛祠之左忠烈祠之  
右移他祠而特新之用祀我公庶愜群情少申積  
感又如巡臺省菴龐侯職非芻牧分專激揚乃銳  
意時艱亟紓民瘼立條鞭之法侵漁者無以行奸  
禁權取之煩苛歛者因而為德令甲既布兩浙咸

甦名雖監司恩寔父母又如南坦劉侯王泉張侯  
任有久暫德並徽良處國如家視民猶子勵冰蘖  
之操鬼神可以陳信薦閭閻之愛上下無有間辭  
此數公者皆祀典所謂法施於民無慙於師帥之  
任南坦先生尤一代名臣三吳譽望在任雖止三  
月而去思尚垂百年茲擬於龍山之麓即劉侯故  
祠稍為增拓前一廳置龐侯神位後一廳置劉張  
二侯神位歲時伏臘少展民思嗚呼召公流愛甚  
至戒翦伐於菱棠羊祜遺思亦且紛涕淚於樹碣  
沐恩知報感飯不忘凡我士民諒同追念謹先薄



倡仰助佳緣緡貫隨宜鉢兩母泥所貴共成勝舉  
出青蚨紫貝於囊中並美羅池續丹荔黃蕉之故  
事民德歸厚惠牧勸來請注冊書爰勤告語

鳴玉堂稿卷之十尾

鳴玉堂稿卷之十一

明世肅行太僕寺卿前湖廣督學副使山陰張天復著 翰林院修撰不肖

山東左叅政門人陳文燭選擇

詩類

五言古

送別少湖徐宗師

時嘉靖甲午以諸生受知

青青水中蘋。離離江上蓀。念此倏言邁。按珮心何煩。飛蓋臨東郊。鳥隼日中翻。春風戀故林。黃鳥鳴高軒。高軒不可繫。黃鳥徒自喧。

摧然追去騾。遠望極川梁。長霧夾天涯。郵亭結嚴

霜猶聞朱瑟音。飄然發清商。清商豈自媚。于以惠  
遠方。遠方有夙懷。感此重翱翔。

題玉溪卷

君家玉溪頭。把釣玉溪口。溪流瀉晴雪。溪山入虛  
牖。開軒弄溪月。春風滿溪柳。人言宋王孫。吾疑渭  
濱叟。悠悠漢上雪。別君良已久。十載排閭闔。達客  
知君否。旋歸躍溪山。毋令故園負。

題爐峰卷

我思香爐峰。翠律凌中天。雲烟晴噴薄。島嶼相蛇  
蜒。百尺崆峒碑。千古金玉篇。自我不見之。荏苒踰

四年紅塵走車馬。白石空林泉。君本青雲士。鐘鼎  
丹心懸。夙昔事幽討。結屋依名川。把釣鏡湖曲。長  
嘯香爐巔。竭來走都下。挾策金門前。使我雲霞想  
逢君。復悠然。何當避矰弋。振翰超蒼烟。緬彼鴻鵠  
姿。霄漢良翩翩。

送是堂俞貳守

君本玉皇吏。三載居蓬萊。東南猥痼瘵。萬井勞剗  
裁。日晏簿無理。退食雲山隈。無時對屏障。賦詩傾  
金罍。佳辰集朋侶。秋水仍迴迴。鏡湖久寂寞。卧龍  
空高臺。寥寥絕代下。復覩貞元才。試登萬里亭。雄

氣凌九垓

朔風吹長途。遠駕鳴駒駉。隼澳翻曉烟。霜露披榛  
萊。使君戒僕夫。遠上金陵臺。扶携走野老。云自山  
中來。持錢欲相贈。惻惻清江隈。攀車佇斯須。柰此  
徵書催。濟濟冠冕子。感餞良徘徊。翩翩黃鵠羽。翺  
翔不可追。引領望鍾山。北斗遙崔嵬。

貞婦篇為抱璞馬母賦

結綺事君子。蘋藻供芳晨。白頭甘糟糠。詎厭長卿  
貧。茂陵苦多病。一朝棄青春。玉臺掩明鏡。羅幃生  
暗塵。懷深不忍吐。空餘未亡身。無夫幸有子。克肖

齊良人。弱齡課詩書。努力追儒紳。辟纁僅朝夕。熊  
膽時具陳。洞房喧啼烏。夜夜成悲辛。既長奉彛訓。  
陟岵思嚴親。殷勤恢遺謨。抱策遙入秦。屢獻不獲  
試。寶席懷嘉珍。歲晚逢

明主。結網羅賢賓。上賦黃金臺。馳傳西江濱。母懷  
甫獲騁。父志亦已伸。丈夫遇有時。何地非通津。孝  
哉勉終始。芳烈勞特循。余亦遠養者。風木徒愴神。  
送彭紹坪郡伯入覲

有序

古今稱越守。以劉公寵為最。范公仲淹踵之。  
然所云最者。非有殊俗眩世之聞。鎮靜寬大。

以基之。豈弟體諒以覆之。時辨其禾莠以耘鋤之而已矣。二公者用是三物以治郡即用是以述職。迨後用是以副公孤名宰執間噫。宜古今皆最之也。頃者紹坪彭公來守吾越其執三物以治實有類於二公。故民之稱公也亦軼二公而三之。其治郡也既如是則其他日公孤而宰執也亦如是可知已。茲值觀期將述其職以告於

天子。寧有外於是乎。然則古今稱郡最諒復何以加於此。余越產既沐公德而當吏滇時

與公有并州雅於其行也歌以致緇衣焉而  
先之以序

越守紀劉范豈直循吏資大鑪含洪亮無用小響  
馳以知公孤器悃櫟謝媚姿覆幬融萬物雕琢安  
所施明侯秉茲德冲襟蔚春儀罄折以為禮烹鮮  
得所師回睇劉范徒齊足驛與驪棠葉日以長戒  
車有所之流水解朝宗載見安可遲載見固有期  
邦人亦有私明府驅車去畢覲何時歸田疇待公  
理子弟藉公師回轍勿停轡執策驅路岐念余舊  
所役日有并州思他人尚眷戀余獨忘繫維驪駒



且莫歌歛襟前致辭

蟠桃篇

磅礴海東涯。浩漭天南極。清淑散扶輿。佳氣日以積。積深鍾大靈。竒禎發休澤。托根崑崙巔。敷秀青冥陌。開花自千春。結子期大實。喜見種桃人。桃開始丹液。丹榮長不老。耄耄桃花色。夙昔偕結縭。高堂羨雙白。白頭忽已遐。初花亦先摘。孫英繼清芳。含輝振芳翮。譬彼錦浪鯨。橫飛向秋夕。他日瓊臺珎。應聯金馬客。竒葩晚長榮。許獻歸毋德。奕葉垂令芳。聖善勒金石。爰知東海桃。原自西池核。

高山操有序

昔者孔子之過梁甫而嘆曰：違山十里，蟪蛄聒耳。蓋言治貴靜，不貴譁也。他日宓子治單父而衆悅，孔子質其故。宓子以已所父事所兄事所友之者以對。孔子少之。宓子乃進曰：單父有賢於不齊者五人，不齊師而稟度焉。意者非其所以爲衆悅之道乎？孔子嘆曰：求賢以自輔，雖堯舜之治天下，不過是矣。惜哉！不齊之所治者止於邑也。噫！其他日所以嘆蟪蛄之故耶？余衰且廢，不知其他。第見一中。

先生之下車以臨會稽也民飽而恬恬士禮而便便日異而月不同至於三年蓋熙然忘其他焉余覘其故則見侯之待人以等苟貌抑者心必隨之非以飾也其得宓子父事兄事友之者之遺乎迨其所賢而重之與舉而噓之者凡數輩雖不敢以師言以稟度言乃其與徒抑貌以事之者則有間矣嗚呼此三年之治非靜而不譁者之効乎而余為最駕顧蒙許可視諸輩更有間此則不知其為何也夫求賢自輔足以佐理天下而不足以淹

一邑吾夫子之言也。余特愧不賢耳。然不可以余之不賢而謂侯之所禮而重之舉而噓之者槩非賢也。推以佐理天下固其宜哉。余怪當世之譁者拒賢以自善而卒視其終能如宓子之悅於衆者否也。今公被召以行則佐理之始也。第余復日衰老不忍知已。一旦舍我而去噫。此伯牙之所以絕絃而終身不鼓也。歟。敝廬雖城也。然傍卧龍之麓。先生德則峻矣。然不拒余仰止。而今固不可攀矣。因撫高山之操。且播以三章。為先生行李塵。

明府嵩嶽秀結組宰山城飛鳧一以止威鳳和其  
鳴長養百巢鷦三年勞哺翔叶一朝舍雛侶五采  
儀瑤京俯聆幽谷吭無枝不吞聲

側聞伯起翁關西號夫子抗言辭夜金貞心皎秋  
水念君三載間茹葵無一旨朗節映關西君豈其  
苗裔一介良獨難三公安足齒

養民既有恩待士復有禮求賢以咨諏造廬式其  
垓而我豈伊人濫膺公所美購駿良亦難買首自  
隗始豈無梁與肉願為昌歎嗜君今閭闔行從此  
將萬里囊軫不復操絃絕為知已

春日同霍二梧吳定泉趙裕菴燕集纓泉年  
丈龍門草堂四首

襟木響春禽。躋雲入空翠。高標海西霞。遙映巖間  
寺。空谷聞磬聲。荒室餘古意。幽人山下來。知心發  
長喟。

保山鬱靈秀。蒼蒼拂華蓋。碧沼不生潮。青螺隔浮  
靄。春深百雉西。雲來三島外。琴尊逗夕陽。月林動  
清籟。

閑亭水木佳。幽意叵堪測。青霞飛不留。白鳥近可  
即。興慙同心賞。歡遂平生憶。墅際微陽來。前村送

晴色

一水清可鑒。千山蒼欲流。雲涵群木淨。鳥宿迴塘幽。萬事且瓢飲。千金空數裘。朝花復晴絮。世事憑悠悠。

越望亭夜酌分韻得壁字

瑤亭倚青旻。海色涼欲滴。雄雉攬山容。澄湖通晚汐。馮夷蕩朝暮。激紋搖蒼壁。天關手可捫。巖花翠堪摘。鶴唳喧晴空。溶溶月孤白。嗟哉使君賢。居煩獨耽寂。日昃訟庭空。登高豁遐適。好我在周行。結襪永嘉客。前村携醪至。主人下州宅。聊余廁賓筵。

慙言附三益。塵襟濯清飈。矯焉天際翔。高吟入霞  
霏。長嘯薄雲激。中宵秉燭還。攀蘿破新碧。緬思曲  
水辰。何如亭中夕。

七言古

送友人從軍

烽烟遠逐天南來。江雲黯慘春不開。

天王玄威震函夏。倭奴尚敢窺吳臺。吳王臺下橫  
萬艘。鼃鼃撼波妖狐走。窮村野甸紛如麻。空江夜  
夜驚刁斗。刁斗聲傳萬壑鳴。健卒彎弓半死生。吁  
嗟寰宇今如此。壯士吞聲遙不平。之子學文兼事



武意氣吞胡軼今古一朝投筆辭金門願駕長風  
殲桀虜錦袍玄髮馳刻川雕弧霜戟凌蒼烟腰間  
神鐔吼龍泉光芒直射扶桑前扶桑日正懸銅柱  
標青天揮戈挽餘照羽翰何翩翩擊筑便作祖生  
舞請君談笑收豺虎君行君行慎莫停拊髀何事  
勞

明主

題林侍御五蝠歸尊圖

長安曙色浮禁煙金門驄馬何翩翩暫辭北闕持  
使節遙指南山作壽筵羨君致身功業早繡斧趨

庭親未老。聖世經營。精力剛。仙翁燕喜。容顏好。我  
欲修辭記所聞。悠然得象還忘言。誰將綵筆寫奇  
妙。五蝠蟬聯歸一尊。尊以喻椿庭。蝠以介繁祉。至  
和吞納含衆美。劒水于今出洛書。平山有意宗箕  
子。君不見青鳥飛來瑞氣藪。露盤承接甘泉宮。何  
似君家集蝠多。後天歲月皆壺中。

壽烏石吳憲伯崑崙歌

崔嵬貝闕崑崙東。雲霓縹緲群仙宮。群仙歲歲敞  
華宴。弱水微茫人不見。蜺來東海烟雲接。坐看瑤  
館仙群合。紫芝歌徹碧桃爛。玉簫金管聲相答。中

有餐霞鳥石翁。伉儷雙白瀛海東。百年竊食瓊瑤。  
實四時並駕滄洲虹。竊實歸來發嘉莖。駕虹曾上  
崑崙頂。憶折天香過廣寒。玄髮春風咲沉醑。于今  
甲子復再還。人生世事須臾間。滇南頌碣去日窅。  
臨安霜節浮雲閒。却向東門理真訣。培蘭種玉繇  
瓜瓞。手鞭赤霧騰蒼龍。坐看威鳳鳴丹穴。吁嗟此  
翁生不空。星華婺彩信所鍾。眼前芳桂何叢叢。鳴  
珂振珮應如公。應如公。玉堂橋梓齊華榮。年年彩  
舞長相從。

雙清堂歌贈孫隣竹隣桂二昆玉

君家舊住陽湖曲。湖光日繞門前綠。開軒長坐水  
晶宮。白石青山看不足。聞君兄弟少同居。華軒夏  
屋深渠渠。卜隣不愛千金客。脩篁丹桂羅前除。燕  
山何必竇氏宅。山陰空有王子廬。高堂八月輕風  
發。飄香戛玉清有餘。有時散落黃金粟。萬斛天香  
入茅屋。折來風露濕瑤枝。何似幽蘭被空谷。有時  
天籟鳴琅玕。瀟湘清夜秋風寒。抱瑟綺席月照戶。  
青天驚起蒼龍蟠。自是君家清可繼。隣有竹弓還  
有桂。行看奇秀自山川。桂子龍孫發禎瑞。

讌別行送須野張公之南都通政時人日夜

集朱子文石徐子望湖王子分源郭子兩峰

同在坐感遇戀分湯有此賦

今夕何夕殊未央星聯奎聚羅前堂高歌夜半興  
轉劇金蓮寶炬生輝光三吳才子金門客十年走  
馬長安陌望鄉屢上黃金臺便欲乘風超羽翮漢  
家天子登夔龍奉常三載多豐功擢君納言養君  
望錦衣賜下天南東交龍曉發燕臺路文虹夜繞  
春天樹赤膽長懸日月旁夢魂先到雲飛處雲間  
二月生萼菰桃花水深浮紫鱸萼羨鱸膾聊適意  
燮調詎肯忘唐虞唐虞舊闕天中奠鳳凰臺接麒

麟殿朝回日日酣。青春鶯花正值春風面。丈夫富貴亦何為。風塵來往傷低垂。江湖廊廟意兩適。嗟君此行真足奇。伊余驚蹇陸沉者。懷銘自愧青霄下。閉門抱膝猶長吟。徒憐未獲逢陶冶。昨歲移家近茂先。雙龍鍛鍊凌風烟。呼余拂拭來相贈。婆娑杯酒何翩翩。黃金白璧傾意氣。惜別酬知多感歎。明光一日思近臣。驂鸞騎鳳還楓宸。

### 醉翁歌

蹇子置身塵埃中。長安看花春風薄。賦罷長門歸思洵。絲韁旦晚辭城郭。主人愛客邀追陪。出示一

卷壺天樂。歆賦慚非倚馬才。刻燭索題何太惡。君  
不。見。萬。花。如。錦。簇。名。園。王。孫。鬪。巧。憐。杜。若。昨。夜。鳩  
聲。帶。冥。雨。紅。消。粉。褪。枝。零。落。又。不。見。梧。桐。枝。踈。月  
正。圓。佳。人。坐。愛。圍。珠。箔。雞。聲。喔。喔。砧。杵。鳴。東。方。漸  
高。星。錯。落。春。花。秋。月。等。閑。度。百。年。懽。笑。幾。重。約。陰  
晴。百。事。君。莫。論。尊。前。有。酒。且。斟酌。咸。陽。黃。犬。空。自  
嘆。平。生。識。字。還。授。閣。綠。珠。侈。富。紫。絲。帳。一。旦。時。違  
身。軌。縛。爭。如。群。翁。坐。壺。天。形。忘。爾。汝。恣。歡。譁。一。飲  
百。斛。吸。長。鯨。玉。山。自。倒。壺。自。傾。何。須。再。跨。揚。州。鶴  
飄。飄。羽。翰。薰。風。生。任。君。走。馬。金。門。路。任。君。提。兵。青

海渡但願長如群翁倒玉尊風波不動忘晨昏

寄湘溪鄭給諫

龍飛新運萬方朝鳳出鳴陽五色毛簪筆每凝青  
瑣署封章時出碧梧高却憐倦鴈衡陽去何意孤  
臣此日遭幸解網羅還短翼得從蓑笠攬長篙還  
憐象馬蟠諸窟夜逐梟盧搏幾巢楚國失弓誰竟  
得樵人夢鹿意何勞後宮粉黛呈花貌別浦菰蒲  
占雪濤馬援已歸傾薏苡張騫猶恨獻葡萄玉關  
生入蒙鈞力瓊樹遙思託素毫知己生身兩難報  
祗憑歌嘯扣漁舸



嘉瓜篇贈會稽楊侯

清遠高樓枕水涯和風甘雨釀靈芽古來見說達  
枝木今日驚看並蒂瓜並蒂嘉瓜世所稀交金劈  
玉不相離上絲旣裊雙肱麗末蔓仍連四乳垂四  
乳雙肱引翠篁黃琮金鐸掛琳琅河陽花並羞潘  
令合浦珠聯擬孟嘗珠聯花並春無已微香小脆  
芙蓉裏鼯鼠緣藤吏不呵鴛鴦疊萼梅能擬復道  
朱明五月時明府披圖鎖棘司歸來欲採充葵食  
散步那知瑞物滋隔葉浮池魚侶躍窺花作隊鳥  
先知魚鳥欣欣識天意烝黎却走觀如市共說當

年出句容何如今日垂官墅官居官墅異民家一  
迴一看盛光華輜車使者交相詫張騫翻覺陋瓜  
沙年來郊藪充麟鳳后稷當畦應奉奉休云五色  
誇青門月令由來珍此種太平新運既云符況值  
明府翔雙鳬地當瀉鹵歲頻歉公來頓見煩苛蘇  
三年催逋罷鞭朴肯令載道歌無襦又如慈母孩  
諸子不使無辜及一夫一夫觸法酈炎疾疾以狂  
妻事有六載囊頭坐園石鼓琴只待嬰尺刀索米  
同類者終朝無一粒誰言微命可無妨六月曾經天雨霜  
座客誰令贖漢史世人皆欲殺佯狂我公仁明眸

容溢削瓜不似臯陶色寸毫墨霧洒陽春萬里青  
天飛霹靂一雨東海炎蒸涼涸鱗枯翼重翱翔于  
公無冤天自報草木因呈和氣祥連穗嘉禾書頴  
曲兩岐瑞麥頌漁陽天教靈貺歸嘉實調羹和鼎  
登明堂公德無量溟海深舉公一事為公陳徵車  
早見 堯廷召莘雨商霖霈大鈞

盧生歌

昔年負笈尋吾廬千里踏雪穿長逵當時我亦章  
縫侶問君遠來將奚為橫經向余便長跼六籍煩  
君發幽秘余慙譎劣願敢當傾蓋多君結深契余

時壯齡君尚少晨雞夜燭嗟同調文園發憤且下  
帷藿食潛心在廊廟懷鉛射策金門天余也早達  
君不前南窮夜郎北燕趙潦倒浮沉三十年扁舟  
歸來向湖海羞將短刺干時宰花溪月塢訂鷗盟  
舊時結交幾人在中霄忽動廬生夢開筵花間來  
二仲依然追憶相逢時刻川雪夜排深凍君潛東  
谷余鏡波各占一曲山之阿骭離于今皆白髮肯  
隨濁世爭風波飛車五嶽酬夙許指點江山探細  
巨艤舟月下談青烏天地形骸入尊俎

江亭歌送別駕熊君擢守黔南姚郡

柳花細點王孫草朝來送客長亭道三年計簿長  
官賢吳越風謠聲聞好劉公一錢投清江龜齡三  
賦世無雙蓬萊山水園屏障嘯諾千秋共一堂憶  
昔攀花上苑中元方先馬我相從誰知廿載分飛  
後今弟重來作郡公通家意氣從茲始携兒披襟  
越山裏滇南片檄去何遙我亦兩涉螳螂水障猿  
夜啼山象踪孔雀養雛黃茆東吁嗟丈夫奇績往  
往當絕域何用臨岐泣素風

子規

赴滇作

子規子規鳴山阿少年獻策今婆娑蠻烟鳥道長

相過石田茅屋青山多  
單車萬里徒坎坷青閨有  
淚沾衣羅子獨不歸奈爾何  
前山有鳥聲相和行  
不動兮哥哥

岐山歌贈四明唐子

岐山岐山滄洲賔紫髯白面歌  
綸巾少年曾挾天  
人策排雲闔闔干紫宸當時不偶漢天子投筆便  
逢曹將軍將軍授我長生鏡鏡中萬態毫端定一  
揮迥絕塵外機尺練群誇畫中聖畫中聖疇與倫  
四明僊客曹將軍第令不窺神僊秘孔麟魯虎誰  
為真世人繪貌不繪神常將國色埋荆榛漢宮娥

眉延壽筆千年青塚掩胡塵。初陽復生抱長戚。長  
憐此情何人惜。酣歷風烟六十年。浮沉宦海虛通  
籍。多君寫我骯髒心。瘦骨峻嶒髮霜白。髮霜白朝  
出南邨。暮西陌。滿簑明月頽然歸。吁嗟可是金門  
客。

五言律

送儀部臬厓聶君解官還永豐三首

送君還舊業。春色正芳華。碧嶂應留屐。青門好種  
瓜。鵷班遺綵綬。鶴逕吸丹霞。宣室他年召。  
君恩諒未涯。

數載浮沉客。多君裘馬情。貧嘗知鮑子。涸豈歎莊  
生。淮浦孤帆夜。匡廬萬里程。冥鴻應有托。孺子喜  
同聲。徐君儀同先謝事歸

白日風波遠。青霄羽翼輕。懸知戲綵日。深慰倚門  
情。夜月悲王粲。春風憶賈生。時過棲集處。空使旅  
魂驚。

送趙兵巡之東莞

越客促驪駒。蒼茫嶺海隅。千山瘴烟滿。萬里布帆  
孤。豺虎埋南服。星辰仰上都。凌風吐長劍。應使百  
蠻蘇。



送縣幕鍾子赴惠安

燕薊復為別。群芳遍小洲。張帆凌曉日。看劍隔清秋。  
越樹烟雲斷。閩山瘴癘收。清風有嘉績。佐幕豈淹留。

送趙思渚赴進賢

渺渺章江上。翩翩潘令過。無葭秋漲滿。機杼曉鍾多。  
庭轉匡山月。灘分石渚波。懸知駐車日。竹馬聽童歌。

又

薊門憐別客。去住各天涯。孤劍凌秋嶂。飛帆度曉

霞鳴蟬。淒岸柳。蕭館急城笳。何日重尊酒。遷喬候  
及瓜。

秋懷

絃管繁鄉淚。風塵繫馬蹄。清秋隴雲暗。落日海天  
低。榆嶺頻征戰。吳關急鼓鼙。何年息刁斗。清夢繞  
山谿。

送縣幕王子赴固始

使幕臨濠子。星輅出上都。曉風鳴劒珮。春雨滿樵  
蘇。花拂河陽露。雲連闕下鳬。淮康回首處。燕月夜  
來孤。

馬孟河檢討使東藩

彤闕頒封典。詞林簡俊流。宸章傳海岱。星使下瀛洲。  
寶玉遙分魯。屏藩永翊周。馬卿元歷覽。賦就嶽雲樓。

吳悟齋給諫使琉球

皇澤含無外。舟航萬里通。金函將漢詔。玉節拜夷封。  
雲蓋長迎日。星帆但信風。海天波盡偃。利涉仰神功。

送李養虛明府二首

使傳臨江郭。丹楓引旆旌。樓臺千嶂合。鼓角四鄰

平萬井弦歌集緣溪棹唱行暫淹仙吏歸端莫屬  
逢迎

野海思求瘼。衝車盡解顏。相期邁明牧。亟與濟時  
艱。海晏弓戈戢。庭空案牒閑。茅茨濫恩沐。重此憶  
鄉關。

題璜溪書室

勝地開靈秘。名宗起廟廊。簪裳盛明宋。勲業自隋  
唐。澤與閩山古。源隨劍水長。臨流讀書處。喬木正  
蒼蒼。

靈雪應制

瑞雪足堯年。東風墜綺筵。灑空成六出。積素自重。  
玄爽氣連金海。祥光滿碧天。應祈微聖德。慶舞王  
壇前。

天山積瑤素。寰宇映空明。共慶豐年瑞。爰知聖主  
情。九玄靈氣合。三殿玉華生。絕塞烟塵淨。長歌頌  
太平。

元夕應制

燈月照晴空。雲霞擁九重。瓊臺瞻鳳輦。火樹簇鰲  
峰。夜永祥光集。時登樂事雍。侍臣叨湛露。千載祝  
華封。

寶炬宵燃。蟻珠星眾。拱辰禁城。三五夜。天子萬年春。地迫金蓮吐。雲開玉藻新。彤闈任攀陟。帝德頌無垠。

挽葛兩溪大卿

帝席承殊眷。華簪謝上卿。清朝優乞老。時論重完名。屐想東山卧。星憐北斗傾。兩溪松檜路。風雨咽秋聲。

宿潮別秦左橋

孤棹滯江津。黃花笑逐臣。秋風顏鬢改。夜雨客愁新。幾月昆明路。千山羈旅身。江濤幸初息。莫厭促

觴頻

送王鳳洲淮陽慮囚

傾蓋分曹日。乘槎奉使年。臨岐攀玉樹。悵別隔蒼烟。寶劒揚秋色。旌帆下海天。知君懷帝德。泣罪使車前。

貴竹道中

迷轍周南紀。崎嶇入夜郎。山形疑楚蜀。蠻俗即氐羌。遠岫浮烟翠。孤城宿草黃。聖朝家四海。聲教被遐荒。

碧雲偶憇。贈悅菴上人

老僧誰作伴。賸有月為鄰。煩惱驅塵障。虛靈見本真。烟雲聊寓跡。湖水澹傳神。午夜蒲團坐。梅花幾樹春。

倚劍亭成晚邀何賓巖年丈讌坐

夕照海天明。山山積翠橫。露寒蠻瘴淨。風急塞烟清。劍倚雙龍吼。亭空獨鶴鳴。尊前話鄉國。隔浦白雲生。

歸鶴和聶司馬韻

遼海旋霜翮。飄飄漢署秋。重聞謦玉露。無復夢蓬丘。望入青霄近。聲隨別調流。應懷舊主戀。何用網



羅求

送尤省丈迴溪僉憲嶺南

霜節傍秋行。徘徊戀闕情。露晞芳草歇。風急遠塵清。  
歛迹看豺虎。先聲有甲兵。遙知開府日。坐使百蠻驚。

送周清泉致仕歸瑞安

三朝黃髮叟。日日侍彤闈。衝曉趨青瑣。分曹下紫微。  
衣傳雙闕露。觴送萬年暉。忽憶桐江月。幡然舊釣磯。

鳴玉堂稿卷之十一 尾

鳴玉堂稿卷之十二

明甘肅行太僕寺卿前湖廣督學副使山陰張夫復著 翰林院修撰不肖男元忭謹校

山東左叅政門人陳文燭選擇

詩類

七言律

送郭少府之溧陽

歲闌承寵出明光。劍舄相隨別路長。江左風烟連  
海岱。天涯蓬鬢歷冰霜。春回故闕探龍虎。日遶荒  
臺憶鳳凰。薄宦莫嫌勞簿領。壯遊重喜得雄方。

送僊臺李太守之越

不與王維詩卷之六  
清秋露冕向江關。寶劒凌風倚碧山。行部正臨青  
鏡裏。散衙長在翠微間。塵清滄海藏刁斗。雲繞蓬  
萊想珮環。寤寐東南勞聖主。早看抒策定時艱。

宋德卿拜官楚邸

十年為賦獻甘泉。駿足初看策錦韉。清世共傳周  
禮樂。春風遙度楚山川。雲迷衡岳三湘遠。江引蘋  
洲七澤連。聞說賢王能貴士。曳裾終日漫詩篇。

王東岑太史使益藩

金函高捧出長楊。玉節遙分指豫章。九派江橫秋

水合雙龍闕。迥曙雲翔。河山帶礪開新祚。禁掖星  
辰歷故鄉。應有先驅迎駟馬。翩翩萊綵映霞觴。

吳後菴太史使周唐二藩

初秋朔吹滿燕臺。橫歷嵩河亦壯哉。路轉南州迴  
北斗。天連中嶽近三台。朝廷典為分茅重。帝  
子筵從便殿開。別後文章益奇氣。應知新自洛中  
回。

王龍峰給諫使岷

天王頒冊遍堯封。青瑣承恩下九重。茅土舊分  
同姓國。金泥新出大明宮。三年補袞雲霄上。八月。

乘槎江漢中。知爾未能忘獻納。行行還為采民風。  
梁鳴泉給諫使代

三晉雄藩衛鎬京。侍臣銜命促王程。風烟野戍迎  
秋色。弓箭行人擁使旌。覽眺共誇詞賦美。歸來應  
悉塞垣情。只今當寧頻西顧。諒有囊封達聖明。

李葵陽中舍使荊

帝錫龍函冊。大藩仙郎初下紫微垣。曉開雙闕爐  
煙裊。秋入三湘野吹繁。相國忠良方翊聖。承家  
簪笏更銜恩。清朝折節人皆羨。所至那聞騎士喧。

又

奉冊詞臣擁使旌。皇華道上玉葵榮。槐庭湛露恩  
先浥。龍衮當陽心轉傾。九向雲峯迴北極。雙遊仙  
珮記南荆。知君江漢觀風後。應悉周南獻聖明。

王給事使晉

重持玉節下長安。豈向風塵悵路難。萬里皇華周  
使者。兩朝韋氏漢儒官。薊門春擁輶軒發。砥柱天  
迴帶礪看。君過鴈門仍草奏。莫令三晉戰雲寒。

送友人幕縣

鶯花迎日滿河橋。岸柳晴絲繫客輶。地控名區雄

赤縣雲連畿輔。傍青霄。平生事業頻看劍。客路逢迎。漫折腰。操割十年。今始試。未應空負聖明朝。

鏡湖徐年丈尹武平

相逢京國憶青衿。玄鬢談經歲月侵。金馬憐君長抱璞。銅章按俗好鳴琴。鄞江曉發烟塵遠。靈壑秋來惠澤深。莫謂吏情淹漢舄。佇看雙闕共朝簪。

田祠祭叅廣南

風流爭羨漢田郎。鳳沼銜恩控一方。五嶺雲霞開瘴癘。扁舟琴鶴下瀟湘。北堂萊綵春初動。南海鯨波畫不揚。借問旬宣多勝覽。好憑歸鴈寄篇章。

成東池拜除還越

薊門歲晏雪峰寒。星節遙臨上將壇。綵筆曾同儲  
桂籍。雕弧初喜拂戎鞍。向憐鄉國頻刁斗。好駕長  
風振羽翰。雄劍早看戲黠虜。莫令江海嘆凋殘。

宋韶巖省丈叅湖藩

十載聯鑣傍棘槐。數行封草每同裁。甘泉久羨揚  
雄賦。郢曲新傳宋玉才。建節春風看戲綵。登樓夜  
月獨銜盃。懸知遙憶天涯客。長樂鍾聲午夜催。

趙莛城省丈憲蜀

早承鳳詔下金鑾。西去雲山馬上看。清世羽儀歸



典客遐方風采重。臺官花迷錦里星旌麗。月滿巴江繡斧寒。自是王導輕九坂。誰言蜀道古來難。

吳悟齋給諫使琉球

侍臣銜命下金門。絕徼遙將雨露分。日麗五雲騰鳳綵。天開三島煥龍文。夷王擁篲迎宸綽。風伯驅塵淨海氛。懸想星槎還魏闕。百蠻通道奏奇勛。

李大行使琉球

宮袍賜錦沐恩多。紉珮新乘漢使槎。雨露一函分玉節。滄溟萬里接銀河。雲開遠浪懸仙嶠。日出群蛟淨海波。遙想扶桑封石處。蕃夷君長待鳴珂。

過磁州贈周芝山年丈

琴鶴舊聞傳五嶺。旌麾初見擁專城。廿年獻賦慙  
同調。千里分符羨令名。京洛古來形勝在。賀蘭西  
去塞烟清。正堪登覽星軺促。鴈影瓊枝無限情。

歸鶴為聶司馬賦

凌秋羨爾雲霄翼。忽復孤飛海上旋。妙舞還逢烟  
樹畔。長鳴猶向露臺邊。爰知介鳥無塵想。應與仙  
翁有夙緣。羽化總憐崑閬隔。棲遲得傍漢宮前。

壽張復菴翁母雙壽

仙郎日夜戀庭闈。獻納初成下紫微。燕闕雲霞開

霽色秦關草樹動春暉。百年未奮心猶壯。二妙齊  
芳願不違。更喜春風雙鳳詔。蟠桃座上正芳菲。

張貞母

蕙幃獨抱湘江恨。茹蘖含冰歲月深。芳草難將黃  
鵠怨。春風空賦白頭吟。投甘尚憶和丸日。繼美爭  
憐截髮心。千載栢舟遺烈在。擬看彤史嗣徽音。

送友人幕吉安

吉郡江山秀且雄。清秋幕府蔭丹楓。官無案牒專  
民瘼。戶有詩書襲古風。漫借一麾聊佐畫。時聯五  
馬問疲癯。買臣莫惜逢時晚。聲績他年達。

聖聰。

贈譚子

短劒初橫萬里天。六橋春樹鎖晴烟。大江東去龍  
門近。絕棧西歸鳥道懸。獻賦擬酬司馬節。草玄無  
愧子雲編。

聖朝羅網非踈闊。况復終軍正妙年。

題梅花小軸奉贈王邵憲繼津便邀過敘草  
堂

庭花千樹遶茅廬。看到梅花盡不如。踈影當年和  
靖宅。清風今日法曹居。臨溪漫惜沉冰幹。入夜還

疑聞玉璫東閣相省更相憶。好開吟興促來車。  
雲門晚歸和是堂俞公祖韻

青山遙送使君行。萬壑流雲接岸生。秋入荒臺風  
葉下。雨深烟谷晚溪平。蒼厓竹筏斜牽纜。白石清  
波綠漾萍。酩酊歸來更漏靜。越王城上玉鉤橫。

送林雙臺省丈督學湖南

玉堤雲樹晝陰陰。衡鴈孤飛思不禁。北斗文章三  
楚望。南宮禮樂百年心。劒橫淮海霜花白。帆落江  
陵秋水深。

聖主垂衣勤側席。煩君轉轂助商霖。

壽筠坡王君六十

袁客部岳翁

子猷宅傍饒春竹。短壑華軒鎖翠筠。倚玉曾招青  
瑣客。吹簫時共白頭人。春來滄渚龍孫集。老去瀛  
洲鶴髮新。正好綠尊歌舜日。不妨坦腹戀楓宸。

吳封君八十膺壽典

碧山爭羨德公廬。林壑惟甘隱鹿車。虞典自應優  
國老。漢旌無用急徵書。尚方雨露聯橋梓。東魯簪  
纓耀里閭。觴綵正堪娛白髮。未須鄉國戀樵漁。

題具慶承恩

漢宮雲樹畫熹微。僊客隨親拜瑣闥。鶴老猶盤雙

闕路烏飛時。傍上林暉香。飄掖院。傳清蹕。花滿瑤階。拂綵衣。自是聖王崇孝理。頓令巖壑被恩輝。

### 壽周清泉

羨爾三朝芸閣吏。蚤年詞賦動甘泉。逃名我亦金門隱。問字君當白髮年。草詔漫同裁雨露。揮毫時見染雲烟。殷勤為祝南山日。好駐流光北斗前。

### 還自零陵用前韻

到處攀緣藉葛蘿。征衣秋薄晚涼多。絳帷久駐慙無補。竹馬相迎喜再過。遍歷楚疆思弭節。遙憐鄉國尚飛戈。黃花欲語歌前徑。却笑淵明鬢已皤。

還自五溪過岳陽訪崔月潭不遇

六度瀟湘歲再闌。風塵霜鬢愧青山。暮霞隔浦鳥  
雙下。秋水連空鷗共閑。波底蒼龍聊並語。雲間黃  
鵠早應還。挂帆尚憶高山調。月滿江心欲扣關。

宿宜城郵館次章鄧山韻兼寄懷

深江風葉暗山城。踈柳鳴蜩引使旌。搖落自應悲  
客鬢。倥傯時復策官程。高秋殘杼飄零夜。隔浦寒  
砧斷續聲。正是懷人繞清夢。不堪啼鴈更含情。

王虛巖紀事

夕陽半墮清溪暝。芒屨獨破蒼苔班。遙入雲烟度



真境忽聞鍾磬鳴。僊關飛蜺斷石對。虎踞懸蘿絕  
壑依。猿攀夜深石房抱。孤月夢聽弱水流。潺潺

九日登太和宮

緣蘿百轉露華輕。紫翠重重繞帝城。天上神宮金  
作屋。雲間僊樂玉為笙。澗盤九渡三天淨。峰疊群  
星一劒橫。此日分萸瞻鶴馭。月明髣髴步虛聲。是日  
玄真冲  
舉之辰

送張潯濱郡憲應召

朱旂畫戟擁樓船。鳳管龍笙繞別筵。忠定勲名初  
有兆。橫渠理學舊能傳。萬家遺愛湖山裏。雙闕承

恩日月邊、

聖主虛懷動訪問、知君奏牘滿三千

和張弘齋謁綠堂韻

廿年塵海嘆沉浮、霄漢何人慰旅愁、相對慢憐饒  
鶴髮、蹇余猶愧戀蠅頭、清時未了蒼生願、匡國寧  
淹綠野儔、春雨滄江若為別、逢春時憶望春樓、君

樓名  
望春

龍里道中值長至寄楊朋石

鬢華老去怯寒多、盡日雲山愁裏過、猛虎嘯風時  
度峽、哀猿啼月尚鳴珂、恩溫未許承宣室、詞賦空

憐吊汨羅。遙想玄陽還瑞籥。春暉先滿玉溝河。  
壽馬白峰太守六十

少小携編扣子長。俄驚雙鬢各星霜。洛園早幸隨  
黃髮。蓬海初逢獻碧觴。五馬聲華甘寂寞。一川烟  
月任踈狂。承家更有青雲客。綵綬年年侍錦堂。

癸亥冬過子陵臺

胥濤滾滾自昏朝。中有高臺接絳霄。擬把絲綸扶  
漢鼎。肯徒諫議犯秋潮。伊周未得酬師傳。巢許何  
妨傲舜堯。莫謂佐王慙尚父。春江渭水本同標。

九疑吊舜廟

聞道南巡駐六飛。簫韶千載太音稀。鳥翔古殿鳳  
儀在。苔滿空庭龍馭歸。清廟當年聞鼓瑟。白頭今  
日見垂衣。九疑指點陵何許。雲雨江天失翠微。

桃川萬壽宮

遠覓仙源問驛頻。千峰立馬散紅塵。當年人避鞭  
笞地。此日山圍宮殿春。方竹露寒猶警鶴。天桃花  
盡已成薪。相逢盡說荒唐事。中有儒生只過秦。

桃源洞

白馬空江越客船。傷春獨往訪夷川。花紅不見咸  
原火。柳暗那知晉隴烟。竹塢殘雲穿徑竇。石橋飛

雪噴山泉。行人莫羨神仙宅。洞口莓苔塵路邊。

宿辰陽江館

芳蘭香芷滿前川。半對漁燈夜不眠。迷轍經年廻  
短棹。蹇驢終日促寒鞭。自憐塵海淹雙鬢。漫取清  
尊媚遠天。莫道虎豺填畏路。石田茅屋有殘編。

醴陵道中晚晴

九十春光半已非。征驂日日苦霑泥。殘雲初喜收  
丹壑。斜日遙看映翠微。抑暗弱枝猶帶雨。桃開荒  
徑競含暉。小園爛熳應無賴。頭白徒傷未拂衣。

曉霽發白石岡

曙色熹微雨乍闌。呼童江閣拂雕鞍。山含淑氣催晴籟。林靄韶光散曉寒。白首負時慙擁傳。青春作伴且彈冠。陰晴互換今非昨。擊筑高歌漫自寬。

送潘少府擢佐淮藩

潘今年来鬢漸疎。朝朝厨傳食無魚。花陰吏散庭空牒。貌瘦民肥績屢書。佐國幸逢新令主。遷官喜在舊鄉閭。梁園受簡饒詩思。好共王維且曳裾。

山王君同時奉徽以行

盤江河瘴雨

隔浦飛虬勢欲奔。危巒深箐一江分。寒濤帶雨風

雷急瘴霧成雲日月昏鳥道極天穿樹杪蛟涎滿  
地失山村星輶歷險連三月此日王孫更斷魂

### 疊水

萬仞蒼厓百道泉倒懸銀漢瀉青天晴雷晝落山  
風外玉螭寒飛雪浪前石潤雲衣無燕舞日翻潭  
鏡有龍眠長空正急西流火好注商霖遍大田

### 平南古渡

絕嶂洪濤鎖薜蘿千年疏鑿武侯多却從捲甲餘  
丹壑賸有飛梁跨綠波風雨似聞彪虎戰煙雲疑  
吳伏龍過朝朝冠冕馳車馬盡說神功並九河

流霞閣和青藤道人韻二首

山圍雲壑水連山、草閣馮虛碧海寬、孤艇時迎春  
漲駐、一尊長帶晚霞餐、荷鋤倦息青蓮塢、把釣晴  
穿紫蕨灣、開筵擬招黃鶴侶、石林明月共遊盤、  
虛牕盡日瞰湖山、開閣春愁漫自寬、草迳苔荒初  
識主、秫田釀熟好加餐、雲生晚浦迷層嶂、花落晴  
川渡小灣、自喜林塘多勝事、薄鱸筍蕨簇春盤、

送黃毅所之留都憲部二首

攀轅黃髮儼成行、借寇無緣衆欲狂、萬井積冤逢  
皎月、百年遺愛有甘棠、君還舊闕探龍虎、我獨荒



臺憶鳳凰誰問漁樵向幽仄好憑秋鴈寄篇章  
赤城仙客向留臺畫戟朱幡江上開傾座風雲來  
指顧論文燈火照尊罍黃初詞賦君無讓白下山  
川誰作媒一自微之上京國蓬萊春雨自莓苔

雪夜訪大司馬沃洲呂公席上漫賦

千林飄玉正殘年夜棹孤航渡剡川越客迂狂堪  
詠譔謝公雅興在雲泉杯傳北海寧辭醉調憶高  
山敢不前可是老生能立雪漏深篝燭探遺編夜

酩酊公出數世圖冊相  
眎既別漏下三刻矣

招何賓巖年丈卧龍卜隣

卧龍風日四時幽疎竹高梧夏亦秋碁局倚雲移  
澗竹釣竿隨月伴沙鷗。天空野外鷓鴣遠。雨過尊  
前島嶼浮。借問何年蔣詡廷。月明二仲與同遊。

寄紫山劉中丞

棄婦翻思舊辛辰。也將衰貌效雙顰。黔江未展瑯  
瑤意。漢論蒙憐薏苡因。萬竈豺貅還入夢。半生牛  
馬任呼人。荷衣碎盡新成理。謾遣雙魚向北津。

寄南明諸宗伯

扁舟散髮只疎狂。却愧青雲附驥場。萬里敝裘行  
對簿。九天仙署正含香。冬郊映日寒枝暖。春史書

雲彩筆光聞道白麻消息近林垌漫為拂干將

贈麟陽趙大理

憶從吏訊入荒炎忍死還馳萬嶺尖漢法婚姻嚴  
得罪何人瀟散此忘嫌使星暫駐鄉園映卿月多  
祥太史占折柳津筵重回首天南天北各纖纖

送友人會試二首

畫舫秋帆江上開繡衣玉斧日邊來龍門此去應  
登薛鶴市何年再訪梅傾座風雲回齒頰論文燈  
火照尊壘故人萬里初得意指顧猶煩向越臺  
江上雲旌晚幸過飛騰無奈故人何省中賜食應

珍異宮裏傳衣盡綺羅。五雲尊酒暮。一簾孤  
月遠懷多。千將應有。太平新燁。燁龍光。傍玉河。

悼王中丞思質

玉關曾見滯嫖姚。若箇功成得渡遼。蜀劍乍寒燕  
闕暝。峴碑不斷楚雲遙。昔憐脰折枯雙渡。此日懸  
衡定。兩朝為報吳江朝。暮水春來無用逐胥濤。

熊別駕進龍衣

霜牙隼旟擁樓船。衣服龍章進帝筵。楚國陽春  
應寡和。江天鴻鵠正齊騫。萬家惠澤湖山裏。雙闕  
恩光日月邊。

聖主虛懷問民瘼，杼空茅屋斷炊煙。

聞兒忤廷魁，報漫賦志喜。

楸枰春酒落花前，此日金泥自九天。報至為三月二十七日時

方對六湖花下校奕我已逃形盤谷老，人傳有子玉堂仙。遙

思楓陛傳臚日，轉憶蘭曹侍從年。余居儀部兩侍三先帝臨

軒策士恩重

兩朝慙報塞，致身兒莫愧人先。兒忤少時有對曰脫穎曾甘客後致

身敢讓人先

寄懷石汀殷開府

衡陽飛鴈渡難過，兩地停雲柰若何。幾載蒼梧憐

日遠昔年黃葉借春多。卧呼絕壘惟卑騎。行部諸蠻早息戈。見說華綸徵赤舄。欲從道左獻饒歌。

明農軒

為沃洲呂公賦

元老寄情農畝事。范公手著養魚經。都忘舊日提戎馬。且向豐年紀太平。一曲山畬馮水旱。幾家社酒話陰晴。祗應賣却床頭劍。未傍青莎買犢耕。

題青牛老子圖壽金龍厓六十

紫氣東來瑞欲浮。旋開江閣望青牛。蚤因關令傳丹訣。漫集仙群進綺籌。黃鵠曾驂天上侶。白頭且狎海中鷗。庭階喜有乘雲器。觴綵翩翩杜若洲。

王貳守生朝

翩翩仙吏住蓬萊，元自玉皇香案來。坐對南山頻  
入几，起看東海一登臺。青春五馬蹄能散，白鹿雙  
轡畫共迴。欲引峰霞斟壽斝，郡泉清白更堪醅。

和張壚山開府寄懷韻

青萍絳帳偶相携，北斗名高未許齊。澤國已酬張  
翰鱠，瘴鄉曾跼祖生雞。坐籌大樹江添塹，沿泛桃  
花路不迷。兵甲甫銷綸綍佇，山中功課與誰稽。

壽龔四泉八十

解組金吾老翠微，龜山春樹靄餘暉。為尋丹藥遲

歸市甘謝紅塵早。息機雲月時陪安石。屐金緋行  
見老萊衣。滿城皓髮誰能似。八十拋筇步欲飛。

別鄭廣文羅山

廣文學士絳帷紗。曾枉琴尊醉若耶。一迳芙蓉紅  
作陣。千門桃李爛如霞。稽山夜雪經題遍。沂水春  
風去未賒。釣艇孤橫佇明月。何時空谷迓來車。

排律

贈廷尉疊厓趙君解官還東歐

祖帳東門敞。星槎南斗還。金閨辭綵綬。白髮隱青  
山。煙月開荒迳。松蘿理故關。狎鷗冷石髓。採藥駐



不鳴玉堂詩卷之十一  
童顏竹下鳴琴迥尊前舞袖班世途憐九折清臺  
喜初閑長嘯赤城裡閑吟東海灣鵬霄一以望鴻  
翼若為攀碌碌塵纓下悠悠滄渚間欲逝矰弋去  
鴈蕩聽潺湲

送姜太史使楚

天子分桐葉詞臣下栢梁共憐星是使况乃王為  
堂江漢環宗室風雲護帝鄉居人思過沛太史復  
浮湘興矚東南壯盟尋帶礪長晴山開絳節高浪  
出牙檣楊柳停旌艷椒蘭設醴芳采風須汝得歌  
雪更誰狂客有探萍實才應賦葯房樓臺招鶴馭

環珮憶鴛行。六博中原路。雙鋒北斗傍。緘書如有  
意。歸鴈自衡陽。

送劉少府

捧檄辭楓陛。鳴珂出鳳城。津亭頻折柳。苑樹急遷  
鶯。九洛星群聚。三川月獨明。桑麻千徑雨。機杼四  
郊聲。泉識劉公操。人傳韋簿名。岸花沾旆濕。琴調  
隔簾清。雞犬增遲暮。兒童解送迎。恩江紅日遠。梓  
里白雲生。戀棘聊棲鳳。哀時欲請纓。因君念鄉國。  
無限賈生情。

送友人惠州營門幕

捧檄趨南極。鳴珂下北陬。笳鼙行處滿。鄉國望中浮。  
五嶺雲烟合。三山瘴癘收。飛鳬猶傍日。看劍欲凌秋。  
久抱葵芹意。初分肉食謀。韜鈴勞佐幕。尊俎借前籌。  
溟海無鯨浪。聊開賈傅憂。

送章生上高簿

栖棘憐高士。含葵抱國謀。長吟梁甫句。時切賈生愁。  
把劍悲雌伏。携琴好壯遊。看花曾惜晚。秣馬正宜秋。  
錦舄凌千嶂。丹楓暗遠洲。蕪葭清漲滿。江閣練光浮。  
訟牒空庭案。桑麻遍野疇。風流知雅調。笑諾繼前修。  
刁斗東南急。瘡痍

聖主憂慙懃佐明牧。百里頌聲流。

送鄧山章公之西川

千里荆南使。三秋蜀道行。暫為黃鵠別。初勒翠微  
銘。山氣浮車騎。江流照旆旌。天連巫峽杳。日轉錦  
官晴。父老函文諭。兒童竹馬迎。褰幃瞻漢冕。叱馭  
問王程。屏翰明時計。旬宣遠徼情。萬家新雨澤。雙  
闕舊風聲。楚甸簪重盍。留都蓋已傾。琴書多古調。  
龜鶴有餘清。劔閣孤雲阻。鸚洲明月生。因君繞懷  
抱。耿耿未能平。

送汪暘谷分教鳳陽

逢君方劇暑。茲別又深秋。一劍蕪城去。三春帝  
里遊。六朝餘勝地。多士足風流。泮壁吞淮海。山川  
入斗牛。每因臯席敞。疑是玉堂幽。君世登翰籍  
桂宇香初動。陵宮瑞欲浮。步雲探虎豹。瞻闕攬貂  
裘。道豈蘇湖重。文將鄒魯儔。經傳鄭子業。賦切賈  
生愁。遙憶長安月。知君獨倚樓。

鏡水留春圖詠

有序

諒夫春之為德。冒六合以同燠。繫寸草而靡  
遺。豈不絜齊而光且郁耶。然使攬為已功。則  
春亦矜物。或受而銖報。則物且小春矣。雖然。

鳥和花咲。當春之至。則疑於歡迎。鳥悽花悴。當春之遷。則疑於婉戀。意者物匪私春。要在天機所激。形聲互代。有似於私而答之矣。越大夫士有鏡水留春圖詠者。送我郡伯某公之量移也。公以惠德蒞治。夙嘗敷春。越邦乃以直道取蹇。茲當需補。燕闕。吾黨留之。莫為計矣。花鳥悽悴。此非其時耶。故各為詩歌。以宣詠物態。迫於不已。寧遏天機。至於其詳。則帳篇共祖。已載之矣。

驄馬勞專郡。金魚掛此身。還將鷹隼義。轉作鳳麟。

仁煦煦。朞年治熙熙。闔郡淳蓬萊。含色潤鏡水。激  
派新儒雅。珍生席丰儀。玉作神辨寃。諳鳥語徵化  
見。蛟馴暫奉樽。曠時陪楮墨。辰尊崇師帥。位燕  
越弟兄親。忽報書傳邱。懸知命出綸。榮枯皆長養。  
煅淬轉精純。駿足終千里。鴻猷付一嘖。祗緣車馬  
促。不禁別離呻。更折河橋柳。將維雀舫人。翠條知  
有日。明歲御溝春。

五言絕

題小景四首贈郡憲王繼津年丈

春山雲半吐。煙渚雨初晴。一逕無人到。扁舟晚自

橫

幽人漫尋勝。載酒入青山。木落風不起。亭空雲自閑。

遠霧吞長峽。深林鎖寂寥。野人移艇子。不問有波濤。

西谷靜秋容。歛山深野色。淒誰懷宋玉。恨獨坐小橋。

題送楊令君圖冊

犬寂萬村烟。禾眠綠野天。留君但稽首。不敢各持錢。

右父老攀轅



山水戀清輝。風雲重九圍。江南急封事。早晚向黃扉。

右蓬萊祖別

俎豆儼風儀。清江愛並垂。柯亭千載月。夜夜照穹碑。

右柯亭紀績

七言絕

丁酉春日江行有感

是歲館于錢唐某氏主  
人不知禮乃題此詩而

歸

三月江南楊白花。隨風漂泊野人家。我來掃石長松下。卧看青陽變物華。

送沈子遊南粵

曾惜明珠暗裏投。青樽話別重淹留。丈夫何處無  
知己。肯向園林老白頭。

鄭學博擢楚藩少傅寄懷武岡王

時王攝國事

湘蘭沅芷賦當年。招鶴亭空尚黯然。寄語賢王正  
當國。翠微何日更談玄。

瑞雪應禱應制

聖主齋心格上玄。恩霽飄玉滿瑤山。四郊共慶年  
多瑞。內苑還疑鶴降仙。

禁城豐瑞足堯年。玉蕊瓊花入歲筵。百辟先春沾  
湛露。萬齡昌律慶齊天。

贈前峰葉鑒士

廬山舊是董僊家。千里尋春種杏花。為起沉疴開  
砭劑。十年琴劍卧烟霞。

因訪孫君識稚川。燒丹為我駐長年。西湖明月高  
山調。驚起魚龍夜不眠。

贈孫松菴

滄洲有客謫仙群。茹栢巢松度夕曛。夜月金尊黃  
鶴夢。春風瑤瑟碧天雲。

題畫

深谷青山鎖白雲。小橋流水度晴曛。綸巾短褐蒼

藤杖憶昨元暉曾似君

送周清泉致仕歸瑞安

世事春風付不聞。拂衣歸去卧秋雲。白頭箕踞滄江上。簪冕于今誰似君。

壽歸翁六十

翁有子涵泉新對大廷

玉堤桃李爛春暉。宮錦新裁五色衣。雲際不須頻拍頤。彩衣何似錦衣歸。

書常礪山都閫卷

開平苗裔出雲間。記取丹書礪若山。萬里封侯尋舊業。金戈鐵馬靜三關。

少年韜略冠兵家。南紀經營早建牙。清夜龍光射  
牛斗。相看。我亦是張華。

彭城舟中和謝公韻兼憶故山社友

夢裡時聽伐木聲。幽人曾許訂初盟。清時未解塵  
纓縛。慙向蓬窓對月明。

戊午夏過徽庶人池館燕坐二首

松竹瀟瀟滿故宮。苑花如咲偃東風。尊前歌舞當  
年事。空使襄王憶夢中。

金谷繁華事已空。池亭花鳥自春風。倚闌無復歌  
前縷。惟有殘枝怨落紅。  
庶人釁禍以小迎東也

巴陵晚泊

平湖淼淼接遙天。雲起君山夾暮煙。何處仙人吹玉笛。梅花飄落洞庭船。

登衡山陰雨忽開紀事二絕

衝曉排雲入翠微。南臺深處覓天梯。擬將望眼窮寰宇。七十二峰雲滿谿。

與客凌秋上祝融。四山風雨任冥濛。浩歌倚劒層雲外。驚起飛鳥滄海東。

關嶺

獨向青冥問遠途。諸峰惟見此峰孤。肩輿彷彿飛

禽背杜宇聲中襍鷓鴣

過桃源觀有感二首

桃源雪後未逢春。逐客何從更問津。世事悠悠但  
流水。漁郎空自悵秦人。

凍霧蠻烟滿客臺。十年蓬鬢笑重來。玄都春色迷  
千樹。曾是劉郎手自栽。

貴陽道中雞公背

百轉峰頭千曲溪。芙蓉朵朵草萋萋。鈎連幸有天  
梯在。未曉穿雲日已西。

宿土官巡司

昔年曾此扣柴扉。咲對侏僂款薜薇。何事塵纓淹  
白首。凌風又上萬山西。

賀王貳守生子

使君此日好開顏。玉樹新芽蓬島間。怪底東南常  
五色。明珠元出卧龍山。

野叟扶藜坐二更。驚傳天上夜光明。起看虹影從  
河漢。併與長庚挂郡城。

晉公早已植三槐。一葉新枝柱國材。定有名題浴  
麟館。令人翻重越王臺。

詞類



點絳脣

余生朝開尊鏡波館友人徐文長賦此為贈  
漫歌以和之凡三闋

其一

釣水樵山白雲伴我滄洲老却憶當年倚劒黔江  
道何似傾壘漫賦池塘草春筵好桃簇秋霞盤實  
如瓜棗

其二

開閣流霞滄江月浸菰蒲老鶴渚鳬汀迥隔羊腸  
道萬頃空濛碧映縈波草春筵好杯影酡顏濃借

霜林棗

其三

雨霽天高。潋灩湖光秋未老。岸夾芙蓉錦浪斜穿道。醪酎芳辰對。數叢瑤草。春筵好。仙客駢來漫分。莫剥棗。

附徐文長原作

烟水茫茫。五湖深處陶朱老。萬里功名一劍曾知道。閣俯流霞階畔生芝草。春筵好。兒在瀛洲新寄。安期棗。

鳴玉堂稿卷之十二

終